

四庫全書

史部

欽定四庫全書

史部

春秋戰國異辭卷三十二

至

詳校官編修

臣曹錫齡

編修

臣裴謙覆勘

總校官庶吉士

臣倉聖脉

校對官中書

臣朱忻

謄錄監生

臣陳昌敬

欽定四庫全書

春秋戰國異辭卷三十二

右春坊右諭德陳厚耀撰

燕

史燕世家召公奭與周同姓姓姬氏周武王之滅紂封召公於北燕其在成王時召公為三公自

召公以下九世至惠侯惠侯當周厲王奔彘共和

之時惠侯卒子釐侯立

索隱曰燕四十二代有二惠侯二釐侯二宣侯三桓

侯二文侯蓋國史
微失本謚故重耳

是時周宣王初立 三十六年

釐侯卒子頃侯立頃侯二十年周幽王淫亂為犬

戎所弑秦始列為諸侯

頃侯

頃侯二十一年周
平王之元年也

二十四年頃侯卒子哀侯立

哀侯

哀侯二年卒子鄭侯立

鄭侯

鄭侯三十六年卒子繆侯立

繆侯

繆侯七年而魯隱公元年也十八年卒子宣侯立

宣侯

宣侯十三年卒子桓侯立

桓侯

桓侯七年卒子莊公立

莊公

莊公十二年齊桓公始霸

十六年與宋衛共伐周惠王惠王出奔溫立惠王弟頹
為周王

十七年鄭執燕仲父而內惠王於周

二十七年山戎來侵我齊桓公救燕遂北伐山戎而還
燕君送齊桓公出境桓公因割燕所至地予燕使燕共
貢天子如成周時職使燕復修召公之法

三十三年卒子襄公立

襄公

襄公二十六年晉文公為踐土之會稱伯

四十年襄公卒桓公立

桓公

桓公十六年卒宣公立

宣公

宣公十五年卒昭公立

昭公

昭公十三年卒武公立是時晉滅三卻大夫

武公

武公十九年卒文公立

文公

懿公

惠公

文公六年卒懿公立懿公四年卒子惠公立

惠公元年齊高止來奔

六年惠公多寵姬公欲去諸大夫而立寵姬宋

宋一作宗

大

夫共誅姬宋惠公懼奔齊

九年齊高偃如晉請共伐燕入其君晉平公許與齊伐燕入惠公惠公至燕而死燕人立悼公

悼公

共公

悼公七年卒共公立共公五年卒平公立

平公

時晉公室卑六卿始彊大平公十八年吳王闔閭破楚入郢十九年卒簡公立

簡公

燕簡公殺其臣莊子儀而不辜莊子儀曰吾君王殺我而不辜死人無知亦已死人有知不出三年必使吾君知之期年燕將馳祖燕之有祖當齊之社稷宋之有桑林楚之有雲夢也此男女之所屬而觀也日中燕簡公方將馳於祖塋莊子儀荷朱杖而擊之殪於車上

墨子論衡

作趙

簡公

簡公十二年卒獻公立

獻公

十二年齊田常殺其君簡公

十四年孔子卒

二十八年獻公卒孝公立

孝公 成公

孝公十二年韓趙魏滅知伯分其地三晉彊十五年孝公卒成公立成公十六年卒湣公立

湣公

湣公三十一年卒釐公立

釐公

桓公

是歲三晉列為諸侯釐公三十年伐齊敗於林營釐公卒桓公立桓公十一年卒文公立

文公

文公元年秦獻公卒秦益彊

十九年齊威王卒

二十八年蘓秦始來見說文公

語已詳國策

文公予車馬金

帛以至趙趙肅侯用之因約六國為從長秦惠王以其

女為燕太子婦

二十九年丈公卒太子立是為易王

以上俱史燕世家

易王

燕易王初立齊宣王因燕喪伐燕取十城易王謂蘓秦曰往者先生至燕而先王資先生見趙遂約六國從今齊先伐趙次至燕以先生之故為天下笑先生能為燕得侵地乎蘓秦大慙曰請為王取之蘓秦見齊王再拜俯而慶仰而弔齊王曰是何慶弔相隨之速也蘓秦曰

臣聞飢人所以飢而不食烏喙者為其愈充腹而與餓死同患也今燕雖弱小即秦王之少壻也大王利其十城而長與強秦為仇今使弱燕為雁行而強秦敝其後以招天下之精兵是食烏喙之類也齊王愀然變色曰然則奈何蘓秦曰臣聞古之善制事者轉禍為福因敗為功大王誠能聽臣計即歸燕之十城燕無故而得十城必喜秦王知以已之故而歸燕之十城亦必喜此所謂棄仇讎而得石交者也夫燕秦俱事齊則大王號令

天下莫敢不聽是王以虛辭附秦以十城取天下此霸

王之業也王曰善乃歸燕之十城

史蘊
秦傳

燕易王之母燕文侯之夫人也與蘇秦私通燕王知之而事之加厚蘇秦恐誅乃說燕王曰臣居燕不能使燕重而在齊則燕必重燕王曰唯先生之所為於是蘇秦佯為得罪於燕而亡走齊齊宣王以為客卿

史蘇
秦傳

鄒陽上梁王書

蘇秦相燕人惡之於燕王

易燕王按

劍而怒食以駃騠

敬秦雖有讒惡王更
膳以珍奇之味也

十年燕君為王

蘇秦與燕文公夫人私通懼誅乃說王使齊為反間欲以亂齊

易王立十二年卒子噲立燕噲既立齊人殺蘇秦

以上俱史

燕世家

王噲

史記 蘇秦之在燕與其相子之為婚姻而其弟蘇代與子之交及蘇秦死而齊宣王復用蘇代燕噲三年與楚三晉

攻秦不勝而還子之相燕貴重主斷蘇代為齊使於燕
燕王問曰齊王奚如對曰必不霸燕王曰何也對曰不
信其臣蘇代欲以激燕王以尊子之也於是燕王大信
子之子之因遺蘇代百金而聽其所使鹿毛壽謂燕王
不如以國讓相子之人之謂堯賢者以其讓天下於許
由許由不受有讓天下之名而實不失天下今王以國
讓於子之子之必不敢受是王與堯同行也燕王因屬
國於子之子之大重或曰禹薦益已而以啟人為吏及

老而以啟人為不足任乎天下傳之於益已而啟與交黨攻益奪之天下謂禹名傳天下於益已而實令啟自取之今王言屬國於子之而吏無非太子人者是名屬子之而實太子用事也王因收印自三百石吏已上而效之子之子之南面行王事而噲老不聽政顧為臣國事皆決於子之

史燕世家

潘壽隱者也燕使人聘之壽見燕王曰臣恐子之如益也王曰何哉對曰昔者禹死將傳天下於益啟之

人因相與攻益而立啟今王信愛子之將傳國焉太子之人盡懷印璽子之之人無一人在朝廷者王不幸棄羣臣則子之亦益也王因收吏璽自三百石以上皆效之子之子之大重

韓子外儲與國策小異

子之相燕坐而佯言曰走出門者何白馬也左右皆言不見有一人走追之報曰有子之以此知左右之

不誠信

韓子內儲上

蘇代為秦使燕見無益子之則必不得事而還貢賜

又不出於是見燕王乃譽齊王燕王曰齊王何若是之賢也則將必王乎蘇代曰救亡不暇安得王哉燕王曰何也曰其任所愛不均燕王曰昔者齊桓公愛管仲置以為仲父內事理焉外事斷焉舉國而歸之故一匡天下九合諸侯今齊任所愛不均是以知其亡也燕王曰今吾任子之天下未之聞也於是明日

張朝而聽子之

韓子外
儲右

三年國大亂百姓惆恐將軍市被與太子平謀將攻子

之諸將謂齊湣王曰因而赴之破燕必矣齊王因令人
謂燕太子平曰寡人聞太子之義將廢私而立公飭君
臣之義明父子之位寡人之國小不足以為先後雖然
則唯太子所以令之太子因要黨聚衆將軍市被圍公
宮攻子之不克將軍市被及百姓反攻太子平將軍市
被死以徇因構難數月死者數萬衆人恫恐百姓離志
孟軻謂齊王曰今伐燕此文武之時不可失也王因令
章子將五都之兵以因北地之衆以伐燕士卒不戰城

門不閉燕君噲死齊大勝燕子之亡

國策作齊宣王是史年誤也又按六國表

云君噲及相

子之皆死

二年而燕人共立太子平是為燕昭王

史燕世家

徐廣曰噲立七年

而死其九年燕人共立太子平

燕王噲讓國於其相子之

噲之五年

而噲老不聽政顧為

臣三年燕國大亂齊湣王使章子伐燕取之醢子之

殺燕王噲又二年而燕人共立太子平為君是為

昭王

類函約史燕世家文

竹書紀年 子之殺太子平不克齊殺子之醢其身

史

趙世家

趙武靈王十二年召公子職於韓立以為燕

王使樂池送之

事不見於燕世家蓋史疎也

昭王

燕昭王問於郭隗曰寡人地狹人寡齊人削取八城匈奴驅馳樓煩之下以孤之不肖得承宗廟恐危社稷存之有道乎郭隗曰有然恐王之不能用也昭王避席願請聞之郭隗曰帝者之臣其名臣也其實師也王者之臣其名臣也其實友也霸者之臣其名臣也其實賓也

危國之臣其名臣也其實虜也今王東面目指氣使以求臣則廝役之材至矣南面聽朝不失揖讓之禮以求臣則人臣之材至矣西面等禮相亢下之以色不乘勢以求臣則朋友之材至矣北面拘指逡巡而退以求臣則師傅之材至矣如此則上可以王下可以霸唯王擇焉燕王曰寡人願學而無師郭隗曰王誠欲興道隗請為天下之士開路於是昭王常置郭隗上坐南面居三年蘇子聞之從周歸燕鄒衍聞之從齊歸燕樂毅聞之

從趙歸燕屈景聞之從楚歸燕四子畢至果以弱燕并

彊齊

說苑
君道

鄒衍如燕昭王擁篲先驅請列弟子之坐而受業碣石

宮

史孟子
荀卿傳

地志 鄒衍臨淄人著書十萬餘言名重列國燕昭

王師之

又有鄒忌鄒
奭號三鄒

劉向別錄 燕有谷地美而寒不生黍稷鄒衍吹律

以溫其氣今名黍谷山

在順天府
懷柔縣

燕昭王於易水

築黃金臺延天下士鄒衍聞之乃自梁入燕昭王築
碣石宮師事之 易州有侯臺相傳周武王築為日
者占候之所燕昭建五樓於上更名五花臺

述異記 燕昭王為郭隗築臺今在幽州燕王故城
中土人呼為賢士臺又謂之招賢臺

燕昭王於破燕之後即位畀身厚幣以招賢者謂郭隗
曰齊因孤之國亂而襲破燕孤極知燕小力少不足以
報然誠得賢士以共國以雪先王之恥孤之願也先生

視可者得身事之郭隗曰王必欲致士先從隗始况賢
於隗者豈遠千里哉於是昭王為隗改築宮而師事之
樂毅自魏往鄒衍自齊往劇辛自趙往士爭趨燕燕王
弔死問孤與百姓同甘苦二十八年燕國殷富士卒樂
軼輕戰於是遂以樂毅為上將軍與秦楚三晉合謀伐
齊齊兵敗湣王出亡於外燕兵獨追北入至臨淄盡取
齊寶燒其宮室宗廟齊城之不下者獨唯聊莒即墨其

餘皆屬燕

史燕世家

燕王使人入海求蓬萊方丈瀛州此三神山者相傳在
渤海中去人不遠未至望之如雲及到三神山反居水
下有仙人及不死之藥皆在焉其物禽獸盡白而黃金
白銀為宮闕

史記封
禪書

拾遺記

方丈
山

燕昭王二年海人乘霞舟以雕壺盛數

斗膏以獻昭王王坐通雲之臺亦曰通霞臺以龍膏
為燈光耀百里煙色丹紫國人望之咸言瑞光世人
遥拜之燈以火浣布為纏山西有照石去石十里視

人物之影如鏡焉碎石片片皆能照人而質方一丈則重一兩昭王舂此石為泥泥通霞之臺與西王母常遊居此臺上常有衆鸞鳳鼓舞如琴瑟和鳴神光照耀如日月之出臺左右種恒春之樹葉如蓮花芬芳如桂花隨四時之色昭王之末仙人貢焉列國咸賀王曰寡人得恒春矣何憂太清不至恒春一名沈生如今之沈香也

又

燕昭王

王即位三年廣延國來獻善舞者二人一名

旋娟一名提嫫並玉質凝膚體輕氣馥綽約而窈窕
絕古無倫或行無踪影或積年不飢昭王處以單綃
華幄飲以瑤珉之膏飴以丹泉之粟王登崇霞之臺
乃召二人徘徊翔舞殆不自支王以纓縷拂之二人
皆舞容冶妖麗靡於鸞翔而歌聲輕颺乃使女伶代
唱其曲清響流韻雖飄梁動木未足嘉也其舞一名
縈塵言其體輕與塵相亂次曰集羽言其婉轉若羽
毛之從風其末曰旋懷言其支體纏蔓若入懷袖也

乃設麟文之席散荃蕪之香香出波弋國浸地則土石皆香着朽木腐草莫不鬱茂以燠枯骨則肌肉皆生以屑噴地厚四五寸使二女舞其上彌日無跡體輕故也時有白鸞孤翔銜千莖穠穠於空中自生花實落地則生根葉一歲百獲一莖滿車故曰盈車嘉穠麟文者錯雜寶以飾席也皆為雲霞麟鳳之狀昭王復以衣袖麾之舞者皆止昭王知其神異處於崇霞之臺設枕席以寢讌遣侍人以衛之王好神仙之術

玄天之女託形作此二人昭王之末莫知所在或云
遊於漢江或伊洛之濱 四年王居正寢召其臣甘
需曰寡人志於仙道欲學長生久視之法可得遂乎
需曰臣遊昆臺之山見有垂白之叟宛若少童貌如
冰雪形如處子血清骨勁膚實腸輕乃歷蓬瀛而起
碧海經涉升降遊往無窮此為上仙之人也蓋能去
滯慾而離嗜愛洗神滅念常遊於太極之門今大王
以妖容惑目美味爽口列女成羣迷心動慮所愛之

容恐不及玉纖腰皓齒患不如神而欲卻老雲遊何
異操圭爵以量滄海執毫釐而迴日月其可得乎昭
王乃徹色減味居乎正寢賜甘需羽衣一襲表其墟
為明真里也 七年沐胥之國來朝則中毒國之一
名也有道術人名尸羅問其年云百三十歲荷錫持
餅云發其國五年乃至燕都善術惑之術於其指端
出浮屠十層高三尺乃諸天神仙巧麗特絕人皆長
五六分列幢蓋鼓舞繞塔而行歌唱之音如真人矣

尸羅噴水為霧霧暗數里間俄而復吹為疾風霧霧皆止又吹指上浮圖漸入雲裏又於左耳出青龍右耳出白虎始出之時纔一二寸稍至八九尺俄而風至雲起即以一手揮之則龍虎皆入耳中又張口向日則見人乘羽蓋駕螭鵠直入於口內復以手抑胸上而聞懷袖之中轟轟雷聲更張口則見羽蓋螭鵠相隨從口中而出尸羅常坐日中漸漸覺其形小或化為老叟或為嬰兒倏忽而死香氣盈室時有清風

來吹之更生如向之形咒術惑神怪無窮 八年
盧扶國來朝渡河萬國方至云其國中山川無惡禽
獸水不揚波風不折木人皆壽三百歲結草為衣是
為卉服至死不老咸知孝讓壽登百歲以上相敬如
至親之禮死葬於野外以香木靈草瘞掩其尸閭里
助送號泣之音動於林谷河源為之流止春木為之
改色居喪水漿不入於口至死者骨為塵埃然後乃
食昔大禹隨山導川乃旌其地為無老純孝之國

九年昭王思諸神異有谷將子學道之人也言於王
曰西王母將來遊必語虛無之術不踰一年王母果
至與昭王遊於燧林之下說炎帝鑽火之術取綠桂
之膏燃以照夜忽有飛蛾銜火狀如丹雀來拂於桂
膏之上此蛾出於員丘之穴穴洞達九天中有細珠
如流砂可穿而結因用為珮此是神蛾之矢也蛾憑
氣飲露飛不集下羣仙殺此蛾合丹藥西王母與羣
仙遊員丘之上聚神蛾以瓊筐盛之使玉童負筐以

遊四極來降燕庭出此蛾以示昭王王曰今乞此蛾
以合九轉神丹王母弗與昭王坐握日之臺參雲上
可捫日時有黑鳥白頭集王之所銜洞光之珠圓徑
一尺此珠色黑如漆懸照於室內百神不能隱其精
靈此珠出陰泉之底陰泉在寒山之北員水之中言
水波常圓轉而流也有黑蚌飛翔來去於五岳之上
昔黃帝時霧成子遊寒山之嶺得黑蚌在高崖之上
故知黑蚌能飛矣至燕昭王時有國獻於昭王王取

瑤漳之外洗其沙泥乃嗟嘆曰自懸日月以來見黑蚌生珠已八九十遇此蚌千歲一生珠也珠漸輕細昭王常懷此珠當隆暑之月體自輕涼號曰銷暑招涼珠

符子 朔人有獻燕昭王以大豕者曰於今百二十歲朔人謂之豕仙羣臣言於昭王曰是豕無用王命宰夫膳之豕既死乃見夢於燕相曰造化勞我以豕形食我以人穢今仗君之靈而化吾生也始得為魯

津之伯而浮舟者食我粳糧之珍而欣君之惠將報子焉後燕相遊於魯津有赤龜銜夜光而獻之

齊攻宋燕昭王使張魁將燕兵以從焉齊王殺之燕王聞之泣數行而下名有司而告之曰余興事而齊殺我使請令舉兵以攻齊也使受命矣凡繇進見爭之曰賢主故願為臣今王非賢主也願辭不為臣昭王曰是何也對曰松下之亂先君以不安棄羣臣

昭王燕王子噲之子先君謂子噲也

松下地名齊伐燕子噲於松下戰為齊所獲

王苦痛之而事齊者力不足也

今魁死而王攻齊是視魁而賢於先君王曰諾請王止
兵王曰然則若何凡繇對曰請王縞素避舍於郊遣使
於齊而謝焉曰此盡寡人之罪也大王賢主也豈盡殺
諸侯之使者哉然而燕之使者獨死此弊邑之擇人不
謹也願得變更請罪使者行至齊齊王方大飲左右官
實御者甚衆因令使者進報使者報言燕王之甚恐懼
而請罪也畢又復之以矜左右官實官實官長也因乃發小
使以反令燕王復舍此濟上之所以敗也

呂覽
行論

齊湣王南敗楚相唐昧於重丘西摧三晉於觀津遂與三晉擊秦助趙滅中山破宋廣地千餘里諸侯皆欲背秦而服於齊湣王自矜百姓弗堪於是燕昭王問伐齊之事於樂毅

樂毅者其先祖曰樂羊為魏文侯將伐取中山文侯封樂羊以靈壽樂羊死葬於靈壽其後子孫因家焉中山復國至趙武靈王時復滅中山而樂氏後有樂毅樂毅賢好兵趙人舉之及武靈王有沙丘之亂乃

去趙適魏聞昭王以子之之亂而齊大敗燕燕昭王
怨齊未嘗一日而忘報齊也燕國小辟遠力不能制
於是屈身下士先禮郭隗以招賢者樂毅於是為魏
昭王使於燕燕王以客禮待之樂毅辭讓遂委質為
臣燕昭王以為亞卿

樂毅對曰齊霸國之餘業也地大人重未易獨攻也王
必欲伐之莫如與趙及楚魏於是使樂毅約趙惠文王
別使連楚魏令趙嚮秦以伐齊之利諸侯害齊湣王之

驕暴皆爭合從與燕伐齊樂毅還報燕昭王悉起兵使
樂毅為上將軍趙惠文王以相國印授樂毅樂毅於是
并護趙楚韓魏燕之兵以伐齊破之濟西諸兵罷歸而
燕軍樂毅獨追至於臨菑齊湣王之敗濟西亡走保於
莒樂毅獨留徇齊齊皆城守樂毅攻入臨菑盡取齊寶
物祭器輸之燕燕昭王大說親至濟上勞軍行賞饗士
封樂毅於昌國號為昌國君於是燕昭王收齊鹵獲以
歸而使樂毅復以兵平齊城之不下者

以上史
樂毅傳

公孫龍說燕昭王以偃兵

公孫龍
魏人

昭王曰甚善寡人願

與客計之公孫龍曰竊意大王之弗為也王曰何故公

孫龍曰日者大者欲破齊諸天下之士其欲破齊者大

王盡養之知齊之險阻要塞君臣之際者大王盡養之

雖知而弗欲破者大王猶若弗養其卒果破齊以為功

今大王曰我其偃兵諸侯之士在大王之本朝者盡善

用兵者也臣是以知大王之弗為也王無以應

呂覽
應言

燕有賢將秦開為質於胡胡甚信之歸而襲破東胡却

地千餘里築長城自造陽至襄平置上谷漁陽右北平

遼西遼東郡以拒胡

史匈奴傳

史

蘇秦傳

秦召燕王燕王欲往蘓代約燕王曰楚得枳

而國亡齊得宋而國亡齊楚不得以有枳宋而事秦者何也則有功者秦之深讎也秦取天下非行義也暴也秦之行暴正告天下告楚曰蜀地之甲乘船浮於汶乘夏水而下江五日而至郢漢中之甲乘船出於巴乘夏水而下漢四日而至五渚寡人積甲宛東

下隨智者不及謀勇士不及怒寡人如射隼矣王乃欲待天下之攻函谷不亦遠乎楚王為是故十七年事秦秦正告韓曰我起乎少曲一日而斷大行我起乎宜陽而觸平陽二日而莫不盡繇我離兩周而觸鄭五日而國舉韓氏以為然故事秦秦正告魏曰我舉安邑塞女戟韓氏太原卷我下軹道南陽封冀包兩周乘夏水浮輕舟彊弩在前鉞戈在後決滎口魏無大梁決白馬之口魏無外黃濟陽決宿胥之口魏

無虛頓丘陸攻則擊河內水攻則滅大梁魏氏以為
然故事秦秦欲攻安邑恐齊救之則以宋委於齊曰
宋王無道為木人以罵寡人射其面寡人地絕兵遠
不能攻也王苟能破宋有之寡人如自得之已得安
邑塞女戟因以破宋為齊罪秦欲攻韓恐天下救之
則以齊委於天下曰齊王四與寡人約四欺寡人必
率天下以攻寡人者三有齊無秦有秦無齊必伐之
必亡之已得宜陽少曲致蘭石因以破齊為天下罪

秦欲攻魏重楚則以南陽委於楚曰寡人固與韓且絕矣殘均陵塞鄆阨苟利於楚寡人如自有之魏棄與國而合於秦因以塞鄆阨為楚罪兵困於林中重燕趙以膠東委於燕以濟西委於趙趙得講於魏至公子延因犀首屬行而攻趙兵傷於譙石遇敗於陽馬而重魏則以葉蔡委於魏已得講於趙則叔魏不為割困則使太后弟穰侯為和羸則兼欺舅與母適燕者曰以膠東適趙者曰以濟西適魏者曰以葉蔡

適楚者曰以塞鄆阨適齊者曰以宋此必令言如循
環用兵如刺蜚母不能制舅不能約龍賈之戰岸門
之戰封陵之戰高商之戰趙莊之戰秦之所殺三晉
之民數百萬今其生者皆死秦之孤也西河之外上
雒之地三川晉國之禍三晉之半秦禍如此其大也
而燕趙之秦者皆以爭事秦說其主此臣之所大患
也燕昭王不行蘇代復重於燕燕使約諸侯從親如
蘇秦時或從或不而天下由此宗蘇氏之從約代厲

皆以壽死名顯諸侯

昭王三十三年卒子惠王立

史燕世家

惠王

樂毅留徇齊五歲下齊七十餘城皆為郡縣以屬燕唯獨莒即墨未服會燕昭王死子立為燕惠王惠王自為太子時嘗不快於樂毅及即位齊之田單聞之乃縱反間於燕曰齊城不下者兩城耳然所以不早拔者聞樂毅與燕新王有隙欲連兵且留齊南面而王齊齊之所

惠惟恐他將之來於是燕惠王固已疑樂毅得齊反間
乃使騎劫代將而召樂毅樂毅知燕惠王之不善代之
畏誅遂西降趙趙封樂毅於觀津號曰望諸君尊寵樂
毅以警動於燕齊齊田單後與騎劫戰果設詐誑燕軍
遂破騎劫於即墨下而轉戰逐燕北至河上盡復得齊
城而迎襄王於莒入於臨菑

史樂毅傳

樂毅為燕昭王謀連四國之兵以伐齊大破之閔王
亡逃僅以身匿莒樂毅追之遂屠七十餘城臨淄盡

降惟莒即墨未下盡復收燕寶器而歸復易王之辱
樂毅謝罷諸侯之兵而獨圍莒即墨時田單為即墨
令患樂毅善用兵田單不能詐也欲去之昭王又賢

不肯聽讒會昭王死惠王立田單使人讒之惠王

燕世

家惠王為太子時與樂毅有隙及即位疑毅

惠王使騎劫代樂毅樂毅去

之趙不歸燕騎劫既為將軍田單大喜設詐大破燕
軍殺騎劫盡收復七十餘城是時齊閔王已死田單
得太子於莒立為齊襄王而燕惠王大慚自悔易樂

毅以致此禍惠王乃使人遺樂毅

戰國策作樂問

書曰寡人

不佞不能奉順君志故君捐國而去寡人不肖明矣
敢竭其願而君弗肯聽也故使使者陳愚志君誠諭
之語曰仁不輕絕智不輕怨君於先王世之所明知
也寡人望有非則君覆蓋之不虞君明棄之也望有
過則君教誨之不虞君明罪之也寡人之罪百姓弗
聞君微出明怨以棄寡人寡人必有罪矣然恐君之
未盡厚矣諺曰厚者不損人以自益仁者不危軀以

要名故覆人之邪者厚之行也救人之過者仁之道也世有覆寡人之邪救寡人之過非君烏所望之今君厚受德於先王之成尊輕棄寡人以快心則覆邪救過難得於君矣且世有厚薄故施異行有得失故患同今寡人任不肖之罪而君有失厚之累於為君擇無所取國有封疆猶家之有垣牆所以合好覆惡也室不能相和出訟鄰家未為通計也怨惡未見而明棄之未為盡厚也寡人雖不肖未如殷紂之亂也

君雖未得志未如商容箕子之累也然不內盡寡人
明怨於外恐其適足以傷高義而薄於行也非然苟
可以成君之高明君之義寡人雖惡名不難受也本
以為明寡人之薄而君不得厚揚寡人之毀而君不
得榮是一舉而兩失也義者不毀人以自益況傷人
以自損乎願君無以寡人之不肖累往事之美昔者
柳下季為理於魯三絀而不去或曰可以去矣柳下
季曰苟與人異惡往而不絀乎猶且絀也寧故國耳

柳下季不以絀自累故遠近無議寡人之罪國人不
知而議寡人者遍天下諺曰仁不輕絕知不簡功簡
功棄大者仇也輕絕厚利者怨也仇而棄之怨而累
之宜在遠者不望之乎君今寡人無罪君豈怨之乎
願君捐忿和怒追順先王以復教寡人寡人意君之
曰余將快心以成而過不顧先王以明而惡使寡人
進不得循初退不得變過此君所制惟君圖之此寡
人之愚志敬以書謁之

新序卷三與國策少異
其樂毅報書同國策

燕惠王後悔使騎劫代樂毅以故破軍亡將失齊又怨樂毅之降趙恐趙用樂毅而乘燕之弊以伐燕燕惠王乃使人讓樂毅且謝之曰先王舉國而委將軍將軍為燕破齊報先王之讎天下莫不震動寡人豈敢一日而忘將軍之功哉會先王棄羣臣寡人新即位左右誤寡人寡人之使騎劫代將軍為將軍久暴露於外故召將軍且休計事將軍過聽以與寡人有隙遂捐燕歸趙將軍自為計則可矣而亦何以報先王之所以遇將軍之

意乎樂毅報遺燕惠王書曰臣不佞不能奉承王命以順左右之心恐傷先王之明有害足下之義故遁逃走趙今足下使人數之以罪臣恐侍御者不察先王之所畜幸臣之理又不白臣之所以事先王之心故敢以書對臣聞賢聖之君不以祿私親其功多者賞之其能當者處之故察能而授官者成功之君也論行而結交者立名之士也臣竊觀先王之舉也見有高世主之心故假節於魏以身得察於燕先王過舉廁之賓客之中

立之羣臣之上不謀父兄以為亞卿臣竊不自知自以
為奉令承教可幸無罪故受令而不辭先王命之曰我有
積怨深怒於齊不量輕弱而欲以齊為事臣曰夫齊
霸國之餘業而最勝之遺事也練於兵甲習於戰攻王
若欲伐之必與天下圖之與天下圖之莫若結於趙且
又淮北宋地楚魏之所欲也趙若許而約四國攻之齊
可大破也先王以為然具符節南使臣於趙顧反命起
兵擊齊以天之道先王之靈河北之地隨先王而舉之

濟上濟上之軍受命擊齊大敗齊人輕卒銳兵長驅至國齊王遁而走莒僅以身免珠玉財寶車甲珍器盡收入於燕齊器設於寧臺大呂陳於元英故鼎反乎磨室薊丘之植植於汶篁自五伯已來功未有及先王者也先王以為慊於志故裂地而封之使得比小國諸侯臣竊不自知自以為奉命承教可幸無罪是以受命不辭臣聞賢聖之君功立而不廢故著於春秋蚤知之士名成而不毀故稱於後世若先王之報怨雪耻夷萬乘之

彊國收八百歲之蓄積及至棄羣臣之日餘教未衰執政
任事之臣修法令慎庶孽施及乎萌隸皆可以教後世
臣聞之善作者不必善成善始者不必善終昔伍子胥
說聽於闔閭而吳王遠跡至郢夫差弗是也賜之鴟夷
而浮之江吳王不寤先論之可以立功故沈子胥而不
悔子胥不蚤見主之不同量是以至於入江而不化夫
免身立功以明先王之迹臣之上計也離毀辱之誹謗
墮先王之名臣之所大恐也臨不測之罪以幸為利義

之所不敢出也臣聞古之君子交絕不出惡聲忠臣去國不潔其名臣雖不佞數奉教於君子矣恐侍御之親左右之說不察踈遠之行故敢獻書以聞惟君王之留意焉

按樂毅書與國策稍異

於是燕王復以樂毅子樂間為昌國

君而樂毅往來復通燕燕趙以為客卿樂毅卒於趙

史樂

毅傳

燕將攻下聊城聊城人或讒之燕燕將懼誅因保聊城不敢歸齊田單攻之歲餘士卒多死而聊城不下魯連

乃為書約之矢以射城中遺燕將書書曰吾聞之智者不倍時而棄利勇士不怯死而滅名忠臣不先身而後君今公行一朝之忿不顧燕王之無臣非忠也殺身亡聊城而威不信於齊非勇也功敗名滅後世無稱焉非智也三者世主不臣說士不載故智者不再計勇士不怯死今死生榮辱貴賤尊卑此時不再至願公詳計而無與俗同且楚攻齊之南陽魏攻平陸而齊無南面之心以為亡南陽之害小不如得濟北之利大故定計審

處之今秦人下兵魏不敢東面衡秦之勢成楚國之形
危齊棄南陽斷右壤定濟北計猶且為之也且夫齊之
必決聊城公勿再計今楚魏交退於齊而燕救不至以
全齊之兵無天下之規與聊城共據期年之敝則臣見
公之不能得也且燕國大亂君臣失計上下迷惑粟腹
以十萬之衆五折於外以萬乘之國被圍於趙壤削主
困為天下僂笑國敝而禍多民無所歸心今公又以敝
聊城之民距全齊之兵是墨翟之守也食人炊骨士無

反外之心是孫臏之兵也能見於天下雖然為公計者不如全車甲以報於燕車甲全而歸燕燕王必喜身全而歸於國士民如見父母交遊攘臂而議於世功業可明上輔孤主以制羣臣下養百姓以資說士矯國更俗功名可立也亡意亦捐燕棄世東游於齊乎裂地定封富比乎陶衛世世稱孤與齊久存又一計也此兩計者顯名厚實也願公詳計而審處一焉且吾聞之規小節者不能成榮名惡小耻者不能立大功昔者管夷吾射

桓公中其鉤篡也遺公子糾不能死怯也束縛桎梏辱也若此三行者世主不臣而鄉里不通鄉使管子幽囚而不出身死而不反於齊則亦名不免為辱人賤行矣臧獲且羞與之同名矣況世俗乎故管子不恥身在縲紲之中而耻天下之不治不恥不死公子糾而恥威之不信於諸侯故兼三行之過而為五霸首名高天下而光燭鄰國曹子為魯將三戰三北而亡地五百里鄉使曹子計不反顧議不還踵刎頸而死則亦名不免為敗

軍禽將矣曹子棄三北之恥而退與魯君計桓公朝天
下會諸侯曹子以一劍之任枝桓公之心於壇坫之上
顏色不變辭氣不悖三戰之所亡一朝而復之天下震
動諸侯驚駭威加吳越若此二士者非不能成小廉而
行小節也以為殺身亡軀絕世滅後功名不立非智也
故去忿忿之怨立終身之名棄忿悁之節定累世之功
是以業與三王爭流而名與天壤相契也願公擇一而
行之燕將見魯連書泣三日猶豫不能自決欲歸燕已

有隙恐誅欲降齊所殺虜於齊甚衆恐已降而後見辱
喟然嘆曰與人刃我寧自刃乃自殺聊城亂田單遂屠
聊城歸而言魯連欲爵之魯連逃隱於海上曰吾與富
貴而詘於人寧貧賤而輕世肆志焉

史魯仲連傳

鄒衍事燕惠王盡忠左右譖之王繫之衍仰天而哭夏

五月天為之降霜

淮南子

惠王七年卒韓魏楚共伐燕燕武成王立

史燕世家按趙世家惠

文王二十八年燕相成安君公孫操弑其王樂資以為即惠王也而燕世家不載何歟

武成王

武成王七年齊田單伐我拔中陽

史家燕世家

十三年秦敗趙於長平四十餘萬

史家燕世家

十四年武成王卒子孝王立

史家燕世家

孝王

孝王元年秦圍邯鄲者解去

史家燕世家

三年孝王卒子今王喜立

史家燕世家

王喜

四年燕王喜命相栗腹約歡趙以五百金為趙王酒還報燕王曰趙王壯者皆死長平其孤未壯可伐也王召昌國君樂間問之對曰趙四戰之國其民習兵不可伐王曰吾以五而伐一對曰不可燕王怒羣臣皆以為可卒起二軍車二千乘栗腹將而攻鄢卿秦攻代惟大將渠謂燕王曰與人通關約交以五百金飲人之王使者報而反攻之不祥燕王不聽自將偏軍隨之將渠引燕王綬止之曰王必無自往往無成功王蹙之以足將

渠泣曰臣非以自為為王也燕軍至宋子趙使廉頗將
擊破栗腹於鄢破卿秦樂乘於代樂間奔趙廉頗逐之
五百餘里圍其國燕人請和趙人不許

史燕世家

六年秦滅東西周置三川郡

史燕世家

七年秦拔趙榆次三十七城秦置太原郡

史燕世家

九年秦王政初即位

史燕世家

樂間居燕三十餘年燕王喜用其相栗腹之計欲攻趙
而問昌國君樂間樂間曰趙四戰之國也其民習兵伐

之不可燕王不聽遂伐趙趙使廉頗擊之大破栗腹之軍於鄣禽栗腹樂乘樂乘者樂間之宗也於是樂間奔趙趙遂圍燕燕重割地以與趙和趙乃解而去燕王恨不用樂間樂間既在趙乃遺樂間書曰

書與國策異

紂之時

箕子不用犯諫不怠以冀其聽商容不達身祗辱焉以冀其變及民志不入獄囚自出然後二子退隱故紂負桀暴之累二子不失忠聖之名何者其憂患之盡矣今寡人雖愚不若紂之暴也燕民雖亂不若殷民之甚也

室有語不相盡以告鄰里二者寡人不為君取也樂間

樂乘怨燕不聽其計二人卒留趙趙封樂乘為武襄君

其明年樂乘廉頗為趙圍燕燕重禮以和乃解

史樂毅傳

十年趙孝成王卒襄王使樂乘代廉頗廉頗攻樂乘樂

乘走廉頗亡入魏後十六年而秦滅趙

史樂毅傳

劇辛故居趙與龐煖善已而亡走燕燕見趙數困於秦

而廉頗去令龐煖將也欲因趙弊攻之問劇辛辛曰龐

煖易與耳燕使劇辛將擊趙趙使龐煖擊之取燕軍二

萬殺劇卒

王喜十二年後事

秦拔魏二十城置東郡

史燕世家

十九年秦拔趙之鄴九城趙悼襄王卒

史燕世家

二十三年太子丹質於秦亡歸燕

史燕世家

二十五年秦虜滅韓王安置潁川郡

史燕世家

二十七年秦虜趙王遷滅趙趙公子嘉自立為代王燕

見秦且滅六國秦兵臨易水禍且至燕太子丹陰養壯

士二十人使荊軻獻督亢地圖於秦因襲刺秦王秦王

覺殺軻使將軍王翦擊燕

史燕世家

荆軻者衛人也

地志淇縣人

其先乃齊人徙於衛衛人謂之

慶卿而之燕

博物志軻字次非
荆人即殺蛟者

燕人謂之荆卿荆卿好

讀書擊劍以術說衛元君衛元君不用其後秦伐魏置

東郡徙衛元君之支屬於野王荆軻嘗遊過榆次與蓋

聶論劍蓋聶怒而目之荆軻出人或言復召荆卿蓋聶

曰曩者吾與論劍有不稱者吾目之試往是宜去不敢

留使使往之主人荆卿則已駕而去榆次矣使者還報

蓋聶曰固去也吾曩者目攝之荆軻遊於邯鄲魯句踐

與荆軻博爭道魯句踐怒而叱之荆軻嘿而逃去遂不復會荆軻既至燕愛燕之狗屠及善擊筑者高漸離荆軻嗜酒日與狗屠及高漸離飲於燕市

地志太子丹與樊將軍飲華陽

臺出美人佐酒

酒酣以往高漸離擊筑荆軻和而歌於市中相

樂也已而相泣旁若無人者荆軻雖遊于酒人乎其為人沈深好書其所遊諸侯盡與其賢豪長者相結其之燕燕之處士田光先生亦善待之知其非庸人也居頃之會燕太子丹質秦亡歸燕燕太子丹者故嘗質於趙而

秦王政生於趙其少時與丹驪及政立為秦王而丹質於秦秦王之遇燕太子丹不善故丹怨而亡歸歸而求為報秦王者國小力不能其後秦稍蠶食諸侯且至於燕燕君臣皆恐禍之至太子丹患之問其傅鞠武

鞠武使太

子請於田光先生田光薦荆軻於太子太子使荆軻持樊將軍首及督亢圖獻秦王因刺之不中殺荆軻並詳

策

秦使王翦伐燕拔薊城燕王喜太子丹等率其精兵

東保於遼東秦益遣李信追擊燕王

史刺客傳

博物志 燕太子丹質於秦秦王遇之無禮不得意

思欲歸請於秦王王不聽謬言曰令烏頭白馬生角
乃可丹仰而嘆烏即頭白俯而嗟馬生角秦王不得
已而遣之為機發之橋欲陷丹丹驅馳過之而橋不
發遁到關關門不開丹為雞鳴於是衆雞悉鳴遂歸

又燕
丹子

列士傳 燕丹使田光值侯荆軻值其醉唾其耳中
軻覺曰此出口入耳之言必大事也則往見光

風俗通 燕太子丹仰嘆天為雨粟

燕丹子 田光謂荊軻曰太子傾心於足下荊軻曰
有鄙志嘗謂心合意沒身不顧情有異一毛不拔
荊軻之燕太子曰田先生今無恙乎軻曰光臨送軻
之時言太子戒以國事恥以丈夫而不見信向軻吞
舌而死矣

燕丹子 太子自喜得荊軻永無憂秦後日與軻之
東宮臨池而觀軻拾瓦投鼃太子令人奉盤金軻用
抵鼃復進軻曰非為太子愛金也但臂痛耳 又曰

太子常與荆軻同案而食同牀而寢 太子與荆軻
置酒美人鼓瑟軻曰好手太子即斷其手以玉盤盛
而奉之

地志

涿州

華陽臺燕丹與樊將軍飲此出美人佐酒

二十九年秦攻拔我薊燕王亡徙居遼東斬丹以獻秦
三十年秦滅魏三十三年秦拔遼東虜燕王喜卒滅燕
是歲秦將王賁亦虜代王嘉

史燕世家

史刺客傳

代王嘉遺燕王喜書曰秦所以尤追燕急者以太子

丹故也今王誠殺丹獻之秦王秦王必解而社稷幸
得血食其後李信追丹丹匿衍水中燕王乃使使斬
太子丹欲獻之秦秦復進兵攻之後五年秦卒滅燕
虜王喜秦逐太子丹荆軻之客皆亡高漸離變名
姓為人庸保匿作於宋子宋子縣名也久之作苦聞其家
堂上客擊筑徬徨不能去每出言曰彼有善有不善
從者以告其主曰彼庸乃知音竊是非家丈人名使
前擊筑一坐稱善賜酒而高漸離念久隱畏約無窮

時乃退出其裝匣中筑與其善衣更容貌而前舉坐
客皆驚下與抗禮以為上客使擊筑而歌客無不流
涕而去者宋子傳客之聞於秦始皇秦始皇召見人
有識者乃曰高漸離也秦始皇惜其善擊筑重赦之
乃矐其目使擊筑未嘗不稱善稍益近之高漸離乃
以鉛置筑中復進得近舉筑扑秦皇帝不中於是遂
誅高漸離終身不復近諸侯之人

太史公曰世言荆軻其稱太子丹之命天

雨粟馬生角也太過又言荆軻傷秦王皆非也

風俗通

卷之六

燕太子丹遣荆軻欲西刺秦王與客送

之易水而設祖道高漸離擊筑荆軻和歌為濮上音
士皆垂髮涕泣後為羽聲慷慨而索瞋目髮盡上指
冠荆軻入秦事敗而死漸離變名易姓為人庸保匿
作於宋子久之作苦聞其家堂上客擊筑伎癢不能
止出言曰彼有善不善從者告其主曰彼庸乃知音
竊言是非家丈人作樂召前使擊筑一坐稱美賜酒
而漸離念久畏約母窮已時乃退出裝匣中筑與其

善衣更容貌而前莫不驚愕下與亢禮以為上客使
擊筑無不涕泣而去者宋子容傳之聞於秦始皇始
皇召見人有識者乃高漸離始皇惜其善擊筑重
殺之乃矐其目使擊筑未嘗不稱善稍益近之漸離
乃以鉛置筑木中後進得近舉筑扑始皇不中於是
遂誅

雜錄

人有言有知不死之道者燕君使人受之不捷而言者

死燕君甚怒其使者將加誅焉幸臣諫曰人所憂者莫
急乎死已所重者莫過乎生彼自喪其生安能令君不
死也乃不誅有齊子亦欲學其道聞言者之死乃撫膺
而恨富子聞而笑之曰夫所欲學不死其人已死而猶
恨之是不知所以為學胡子曰富子之言非也凡人有
術不能行者有矣能行而無其術者亦有矣衛人有善
數者臨死以訣喻其子其子志其言而不能行者也他
人問之以其父所言告之問者用其言而行其術與其

父無差焉若然死者奚為不能言生術哉

列子說符

客有教燕王為不死之道者王使人學之所使學者未及學而客死王大怒誅之王不知客之欺已而誅學者之晚也

韓子外儲左

宋人有請為燕王以棘刺之端為母猴者必三月齋然後能觀之燕王因以三乘養之右御冶工言於王曰臣聞人主無十日不燕之齋今知王不能久齋以觀無用之器也故以三月為期凡刻削者以其所以削必小今

臣治人也無以為之削此不然物也

不然之物謂無益於用也

王必

察之王因囚而問之果妄乃殺之治人謂王曰計無度量言談之士多棘刺之說也一日衛有人好微巧能以棘刺之端為母猴燕王說之養之以五乘之奉王曰吾試觀客為棘刺之母猴客曰人主欲觀之必半歲不入宮不飲酒食肉雨霽日出視之晏陰之間乃可見也鄭有臺下之治者謂燕王曰臣削者也諸微物必以削削之而所削必大於削今棘刺之端不容削鋒王試觀客

之削能與不能可知也王曰善謂衛人曰客為棘刺之

端以削吾欲觀之客曰臣請之舍取之因逃

韓子外儲左

公行子之之燕遇曾元於塗曰燕君何如曾元曰志卑

志卑者輕物輕物者不求助何能舉

荀子大略

燕人李季好遠出其妻私有通於士季突至士在內中妻患之其室婦曰令公子裸而解髮直出門吾屬佯不見也於是公子從其計疾走出門季曰是何人也家人皆曰無有季曰吾見鬼乎婦人曰然為之奈何曰取五

姓之矢

一云尿

浴之季曰諾乃浴以矢一日浴以蘭湯

韓子

內諸

下

燕人生長於楚及老而還本國過晉同行者誑之指城曰此燕國之城其人愀然變容指社曰此君里之社乃喟然而嘆指舍曰此君先人之廬乃潛然而泣指壠曰此君先人之冢其人泣不自禁

列子

郢人有遺燕相國書者夜書火不明因謂持燭者舉燭云而過書舉燭非書意也燕相受書而說之曰舉燭者

尚明也尚明也者舉賢而任之也燕相白王王大悅國
以治治則治矣非書意也

韓非子

春秋戰國異辭卷三十二

欽定四庫全書

春秋戰國異辭卷三十三

右春坊右諭德陳厚耀撰

陳

史陳世家陳胡公滿者虞帝舜之後也昔舜為庶人時堯妻之二女居於媯汭其後因為氏姓媯氏舜已崩傳禹天下而舜子商均為封國夏后之時或失或續至於周武王克殷紂乃復求舜後得媯

滿封之於陳以奉帝舜祀是為胡公胡公卒子申公
犀侯立申公卒弟相公臯羊立相公卒立申公子突
是為孝公孝公卒子慎公圉戎立慎公當周厲王時
慎公卒子幽公寧立幽公十二年周厲王奔於彘二
十三年幽公卒子釐公孝立釐公六年周宣王即
位三十六年釐公卒子武公靈立武公十五年卒子夷
公說立是歲周幽王即位夷公三年卒弟平公變立
平公

平公七年周幽王為犬戎所殺周東徙秦始列為諸侯
二十三年平公卒子文公圉立

文公

文公元年取蔡女生子佗

十年文公卒長子桓公鮑立

以上陳世家

桓公

陳佗無良師傅以至於不義惡加於萬民國人賦墓門以

刺之

詩序 詩傳詩說皆以為
泄冶刺孔寧儀行父之詩

三十八年正月甲戌己丑陳桓公鮑卒

桓公病而亂作國人分散故再

赴桓公弟佗母蔡女故蔡人為佗殺五父及桓公太子

免而立佗是為厲公

史陳世家與左氏異

厲公

利公

莊公

厲公二年生子敬仲完周太史過陳陳厲公使以周易筮之卦得觀之否是為觀國之光利用賓於王此其代陳有國乎不在此其在異國非此其身在其子孫若在異國必姜姓姜姓太嶽之後物莫能兩大陳衰此其昌乎

史陳世家

陳厲公取蔡女蔡女與蔡人亂厲公數如蔡淫七年厲公所殺桓公太子免之三弟長曰躍中曰林少曰杵臼共令蔡人誘厲公以好女與蔡人共殺厲公而立躍是為利公利公者桓公子也利公立五月卒立仲弟林是為莊公莊公七年卒少弟杵臼立是為宣公

春秋傳厲公名躍無

利公 按他即五父躍為厲公而無利公史記誤舛也 史陳世家

宣公

宣公三年楚武王卒楚始強

史陳世家

十七年周惠王娶陳女為后

史陳世家

二十一年宣公後有嬖姬生子款欲立之乃殺其太子

禦寇禦寇素愛厲公子完完懼禍及已乃奔齊齊桓欲

使陳完為卿完曰羈旅之臣幸得免負擔君之惠也不

敢當高位桓公使為工正

史陳世家

齊懿仲欲妻陳敬仲卜之占曰是謂鳳凰于飛和鳴鏘

鏘有媯之後將育于姜五世其昌並于正卿八世之後莫

之與京

史陳世家

三十七年齊桓公伐蔡蔡敗南侵楚至召陵還過陳陳大夫轅濤塗惡其過陳詐齊令出東道東道惡桓公怒

執陳轅濤塗

史陳世家

四十五年宣公卒子欵立是為穆公

史陳世家

穆公

十六年穆公卒子共公朔立

共公

十八年共公卒子靈公平國立

以上史陳世家

靈公

靈公元年楚莊王即位

史陳世家

六年楚伐陳

史陳世家

十年陳及楚平

史陳世家

陳靈公通乎夏姬國人刺之賦株林

子貢詩傳詩說同

詩序 株林刺靈公也淫乎夏姬驅馳而往朝夕不

息焉

夏姬者陳大夫徵舒之母御叔之妻也

孔寧儀行父從君荒淫泄冶刺之賦墓門

子貢詩傳詩序以為刺

陳作之詩今兩
存之以闕疑

詩說 泄治諫靈公孔寧儀行父譖而囚之治作是詩

陳幽公荒淫昏亂游蕩無度國人作宛丘以刺之

詩序

說云陳人譏其大夫之詩
陳無幽公蓋即靈公也

陳靈公行僻而言失泄治曰陳其亡矣吾驟諫君君不
吾聽而愈失威儀夫上之化下猶風靡草風東則草靡
而西風西則草靡而東在風所由而草為之靡是故人
君之動不可不慎也夫曲木者惡得直景人君不直其

行不敬其言者未有能保帝王之號垂顯令之名者也
易曰君子居其室出其言善則千里之外應之況其邇
者乎居其室出其言不善則千里之外違之況其邇者
乎言出於身加於民行發乎邇見乎遠言行君子之樞
機樞機之發榮辱之主君子之所以動天地可不慎乎
天地動而萬物變化詩曰慎爾出話敬爾威儀無不柔
嘉此之謂也今君不是之慎而縱恣焉不亡必弑靈公
聞之以泄冶為妖言而殺之後果弑於微舒

說苑
君道

陳靈公與其大夫孔寧儀行父皆通於夏姬泄冶諫曰
君臣淫亂民何效焉公以告二子二子請殺泄冶公弗
禁遂殺泄冶十五年靈公與二子飲於夏氏公戲二子
曰徵舒似汝二子曰亦似公徵舒怒靈公罷酒出徵舒
伏弩廐門射殺靈公二子皆奔楚太子午奔晉徵舒自
立為陳侯

史陳世家 按左
傳不言徵舒自立

列女傳 陳女夏姬者大夫夏徵舒之母也其狀美
好無匹內挾技術蓋老而復壯者三三為王后七為

夫人公侯爭之莫不迷惑失意公孫寧儀行父與陳
靈公皆通於夏姬或衣其衣以戲於朝泄冶見之謂
曰君有不善子宜掩之今自子率君而為之不待幽
間於朝廷以戲士民其謂爾何二人以告靈公靈公
曰衆人知之吾不善無害也泄冶知之寡人恥焉乃

使人賊泄冶而殺之

新書陳靈公殺泄冶而鄧元去陳以族徙

靈公聽讒囚泄冶內子憂之賦防有鵲巢

詩傳

詩說

泄冶被讒內子憂之而作

詩序以為憂宣公信讒之詩

陳殺其大夫泄冶君子傷之賦澤陂

詩傳 詩說亦云
泄冶諫而死君子

傷之

詩序 澤陂刺時也言靈公君臣淫於其國男女相

說憂思感傷焉

楚莊王為徵舒殺靈公率諸侯伐陳謂陳曰無驚吾誅
徵舒而已已誅徵舒因縣陳而有之羣臣畢賀申叔時
使於齊來還獨不賀莊王問其故對曰鄙語有之牽牛
徑入田田主奪之牛徑則有罪矣奪之牛不亦甚乎今

王以徵舒為賊弑君故徵兵諸侯以義伐之已而取之以利其地則後何以令於天下是以不賀莊王曰善乃迎陳靈公太子午於晉而立之復君陳如故是為成公孔子讀史記至楚復陳曰賢哉楚莊王輕千乘之國而

重一言

史陳世家
與左傳稍別

家語 孔子讀史至楚復陳喟然嘆曰賢哉楚王輕千乘之國而重一言之信匪申叔之言不能達其義匪楚莊王之賢不能受其訓

成公

二十八年楚莊王卒

史陳世家

二十九年陳倍楚盟

史陳世家

三十年楚共王伐陳是歲成公卒子哀公弱立楚以陳

喪罷去兵

史陳世家

哀公

哀公三年楚圍陳復釋之

史陳世家

三十四年初陳哀公娶鄭長姬生悼太子師少姬生偃

左傳鄭姬生太子偃師今此云兩姬又分偃師為二人未知孰是

二嬖妾長妾生留少

妾生勝留有寵哀公屬之其弟司徒招哀公病三月招

殺悼太子立留為太子哀公怒欲誅招招發兵圍守哀

公哀公自經殺

三十五年

招卒立留為君四月陳使使赴楚

楚靈王聞陳亂乃殺陳使者使公子弃疾伐陳陳君留

奔鄭十一月滅陳使弃疾為陳公招之殺悼太子也太

子之子名吳出奔晉楚靈王滅陳五歲楚公子弃疾弑

靈王代立是為平王平王初立欲和諸侯乃求故陳悼

太子師之子吳立為陳侯是為惠公惠公立探續哀公

卒時年而為元空籍五歲矣

史陳世家

惠公

七年陳火

史陳世家

十五年吳王僚使公子光伐陳取胡沈而去

史陳世家

二十八年惠公卒子懷公柳立

史陳世家

懷公

懷公元年吳破楚在郢召陳侯陳侯欲往大夫曰吳新

得意楚王雖亡與陳有故不可倍懷公乃以疾謝吳

四年吳復召懷公懷公恐如吳吳怒其前不往留之因

卒吳乃立懷公子越是為湣公

史陳世家

湣公

吳侵陳斬祀

祀

殺厲

疾

師還出竟陳太宰嚭使於師夫

差謂行人儀曰是夫也多言盍嘗問焉師必有名人之

稱斯師也者則謂之何太宰嚭曰古之侵伐者不斬祀

不殺厲不獲二毛今斯師也殺厲與其不謂之殺厲之

師與曰反爾地歸爾子則謂之何曰君王討敝邑之罪

又矜而赦之師與有無名乎

檀弓下 史記吳王夫差伐陳取三邑而去在陳潘

公六年

潘公六年孔子適陳過鄭與弟子相失遂至陳

主司城貞子家

陳惠公賔之上館

惠公當作潘公孟子所謂陳侯周也

時有隼鳥集於陳

侯之庭而死

陳潘公七年

楛矢貫之石砮其長尺有咫公使

人持隼如孔子館而問焉孔子曰隼之來也遠矣此肅

慎氏之矢也昔武王克商通道於九夷百蠻各使以其

方賄來貢而無忘職業於是肅慎氏貢楛矢石砮其長尺有咫先王欲昭其令德之致遠物也以示後人使永鑒焉故銘其楛曰肅慎氏貢楛矢以分大姬配胡公而封諸陳古者封同姓以珍玉所以展親親也分異姓以遠方之職貢所以無忘服也故分陳以肅慎氏貢焉君若使有司求諸故府其可得也公使求得之金牘如之

合史記及家語

國語畧同

孔子在陳

陳潘公十年

陳侯就之燕遊焉行路之人云魯司

鐸火及宗廟以告孔子曰所及者其桓僖之廟

事見左
哀三年

陳侯曰何以知之子曰禮祖有功而宗有德故不毀其廟焉今桓僖之親盡矣又功德不足以存其廟而不毀是以天災加之三日魯使至則桓僖也陳侯謂子貢曰吾乃今知聖人之可貴對曰君今知之可矣未若專其道而行其化之善也

家語

衡波傳 孔子去衛至於陳途中見二女採桑子曰

南枝窈窕北枝長答曰夫子遊陳必絕糧九曲明珠

穿不得著來問我採桑娘夫子不聽而去既至陳陳
大夫發兵圍之使穿九曲明珠始釋夫子不能思採
桑女所言令門人返至採桑處不見二女見桑枝土
一塊地遺糠三簇回謂賜曰木邊加土必姓杜糠三
簇必名康三姐姊妹詣其家問之謬言女出外以一
瓜獻二子子貢曰瓜子在內汝女必在家其母乃呼
出見誨之曰絲將繫蟻蟻將繫絲如不肯過用煙薰之
夫子如其言乃能穿之於是絕糧七日矣

一統志
亦載此

列女傳 陳國采桑之女陳辨女也晉大夫解君甫
使於宋道過陳遇采桑之女止而戲之曰女為我歌
吾將舍女女乃歌曰墓門有棘斧以斫之夫也不良
國人知之大夫乃服而釋之

十三年吳復來伐陳陳告急楚楚昭王來救軍城父吳

師去是年楚昭王卒於城父時孔子在陳

史陳世家

楚伐陳陳西門燔因使其降民修之孔子過之不軾子
路曰禮過三人則下車過二人則軾今陳修門者人數

衆矣夫子何為不軾孔子曰丘聞之國亡而不知不智知而不爭不忠忠而不死不廉今陳修門者不行一於

此丘故不為軾也

說苑立節
又韓詩外傳

陳惠公大城因趙凌陽之臺

惠公宜
作潘公

未終而坐法死者

數十人又執三監吏夫子適陳聞之見陳侯與俱登臺而觀焉夫子曰美哉斯臺自古聖王之為城臺未有不戮一人而能致功若此者也陳侯默而退遂竊赦所執吏既而見夫子問曰昔周作靈臺亦戮人乎答曰文王

之興附者六州六州之衆各以子道來故區區之臺未及期日而已成矣何戮之有乎夫以少少之衆能立大

大之功惟君爾

孔叢
子上

陳有惡人焉曰敦洽讎廉雄顙廣顏色如浹頰垂眼

一作

髮

臨鼻長肘而盪陳侯見而甚說之外使治其國內使

制其身楚合諸侯陳侯病不能往使敦洽讎廉往謝焉楚王恠其名而先見之客有進狀有惡其名言有惡狀楚王怒合大夫而告之曰陳侯不知其不可使是不知

也知而使之是侮也侮且不智不可不攻也興師伐陳

然後喪

呂覽遇合

陳乾昔寢疾

乾音干

屬其兄弟而命其子尊已曰

尊已乾昔子

如我死則必大為我棺使吾二婢子夾我陳乾昔死其

子曰以殉葬非禮也況又同棺乎弗果殺

檀弓下

湣公十六年吳王夫差伐齊敗之艾陵使人召陳侯恐

如吳楚伐陳

史陳世家

二十四年楚惠王以兵北伐殺陳湣公遂滅陳而有之

史陳世家
詳左氏

春秋戰國異辭卷三十三

欽定四庫全書

春秋戰國異辭卷三十四

右春坊右諭德陳厚耀撰

蔡

史蔡世家蔡叔度者周文王子而武王弟也武王
同母兄弟十人 武王已克殷紂平天下封功臣
昆弟於是封叔鮮於管封叔度於蔡二人相紂子
武庚祿父治殷遺民 武王既崩成王少周公旦

專王室管叔蔡叔疑周公之為不利於成王乃挾武庚以作亂周公旦承成王命伐誅武庚殺管叔而放蔡叔遷之與車十乘徒七十人蔡叔度既遷而死其子曰胡乃改行率德馴善周公聞之而舉胡以為魯卿士魯國治於是周公言於成王復封胡於蔡以奉蔡叔之祀是為蔡仲蔡仲卒子蔡伯荒立蔡伯荒卒子宮侯立宮侯卒子厲侯立厲侯卒子武侯立武侯之時周厲王失國奔彘共

和行政諸侯多叛周武侯卒子夷侯立夷侯十一年周宣王即位二十八年夷侯卒子釐侯所事立釐侯

釐侯三十九年周幽王為犬戎所殺周室卑而東徙秦始得列為諸侯

四十八年釐侯卒子共侯興立

共侯

共侯三年卒子戴侯立

戴侯

戴侯十年卒子宣侯措父立

宣侯

宣侯三十五年卒子桓公封人立

桓侯

二十年桓侯卒弟哀侯獻舞立

以上史
蔡世家

哀侯

哀侯十一年初哀侯娶陳息侯亦娶陳息夫人將歸過

蔡蔡侯不敬息侯怒請楚文王來伐我我求救於蔡蔡必來楚因擊之可以有功文王從之虜蔡哀侯以歸哀侯留九歲死於楚凡立二十年卒蔡人立其子盼是為

繆侯

史蔡世家約左氏文

繆侯

繆侯以其女弟為齊桓公夫人

十八年齊桓公與蔡女戲船中夫人蕩舟桓公止之不止公怒歸蔡女而不絕也蔡侯怒嫁其弟齊桓公怒伐

蔡遂虜繆侯南至楚郢陵已而諸侯為蔡謝齊齊歸蔡侯

二十九年繆侯卒子莊侯甲午立

史蔡世家
約左氏文

莊侯

三十四年莊侯卒子文侯申立

文侯

二十年文侯卒子景侯同立

景侯

四十九年景侯為太子般娶婦於楚而景侯通焉太子殺景侯而自立是為靈侯

以上史
蔡世家

靈侯

蔡侯宋公鄭伯朝於晉蔡侯謂叔向曰子亦奚以語我對曰蔡言地計衆不若宋鄭其車馬衣裘侈於二國諸侯其有圖蔡者乎處期年荆伐蔡而殘之

說苑
權謀

十二年楚靈王以靈侯殺其父誘蔡靈侯於申伏甲飲之醉而殺之刑其士卒七十人令公子弃疾圍蔡十一

月滅蔡使弃疾為蔡公

史蔡世家

下蔡威公閉門而哭三日三夜泣盡而繼以血旁鄰窺
牆而問之曰子何故而哭悲若此乎對曰吾國且亡曰
何以知也應之曰吾聞病之將死也不可為良醫國之
將亡也不可為計謀吾數諫吾君吾君不用是以知國
之將亡也於是窺牆者聞其言則舉宗而去之於楚居
數年楚王果舉兵伐蔡窺牆者為司馬將兵而往來虜
甚衆問曰得無有昆弟故人乎見威公縛在虜中問曰

若何以至於此應曰吾何不至於此且吾聞之也言之者行之役也行之者言之主也汝能行我能言汝為主我為役吾亦何以不至於此哉窺牆者乃言之於楚王遂解其縛與俱之楚

說苑
權謀

楚滅蔡三歲楚公子弃疾弑其君靈王代立為平王平王乃求蔡景侯少子廬立之是為平侯

史蔡
世家

平侯

平侯九年卒靈侯般之孫東國攻平侯子而自立是為

悼侯悼侯父曰隱太子友者靈侯之太子平侯立而殺
隱太子故平侯卒而隱太子之子東國攻平侯子而代

立也

史蔡世家

悼侯

悼侯三年卒弟昭侯甲立

史蔡世家

昭侯

昭侯十年朝楚昭王持美裘二獻其一於昭王而自衣
其一楚相子常欲之不與子常讒蔡侯留之楚三年蔡

侯知之乃獻其表於子常子常受之乃言歸蔡侯蔡侯歸而之晉請與晉伐楚

十三年春與衛靈公會邵陵蔡侯私於周襄弘以求長於衛衛使史鰌言康叔之功德乃長衛夏為晉滅沈楚怒攻蔡蔡昭侯使其子為質於吳以共伐楚冬與吳王闔閭遂破楚入郢蔡怨子常子常恐奔鄭

十四年吳去而楚昭王復國

十六年楚令尹為其民泣以謀蔡蔡昭侯懼

二十六年孔子如蔡楚昭王伐蔡蔡恐告急於吳吳為蔡遠約遷以自近易以相救昭侯私許不與大夫計吳

人來救蔡因遷蔡於州來

州來在淮南下蔡縣

二十八年

左哀四年

昭侯將朝於吳大夫恐其復遷乃令賊

利殺昭侯

利賊名也

已而誅賊利以解過而立昭侯子朔是

為成侯

史蔡世家約左氏文

成侯

十九年成侯卒子聲侯產立

聲侯

聲侯十五年卒子元侯立

元侯

元侯六年卒子侯齊立

侯齊

侯齊四年楚惠王滅蔡蔡侯齊亡蔡遂絕祀後陳滅三

十三年

以上史
蔡世家

春秋戰國異辭卷三十四